

Sopra il Giuoco del Seminario.

CANZONE XX.

Una bela bisaria
 M'è sautà ant la fantasia
 Pr componne sta canson
 Sul gran gieugh del seminari,
 Coul che 'l mond pr l'ordinari
 A lo ciama l'estrassion.
 Verament a l'è da rie
 Vede j' oimo, ficui e fie,
 Fomne, preive, monie e frà,
 Tuti quanti lambichesse
 So servel pr guadagnesse
 D'gratacui an quantitá.
 Tuti fan i gabalista,
 E dan man a coula lista,
 Figurandse d'esse andvin;
 Tramantré coui impresari
 Rio tant, ch'a dan 'n sgari,
 An gratandie i seu quattrin.
 Antratnive su le piasse
 Pr senti dle rasonasse
 Dle pi lepide del mond,
 An fasend ste conferense
 J'è chi va spuand sentense
 Senza riva e senza fond.
 Antrè drint ant le butee
 Pr senti dle drole idee,
 E conteise d'opinion,
 Un a dà pr franch 'l tranta,
 N'autr a dis ch'a l'è l'otanta,
 N'autr a veul che 'l tre sia bon.

Ma pr pieve un past a rie,
 Basta andè quand fomne e fie
 A fan conversassion,
 Sentirè con che babia
 Van tratand d'astrologia,
 E parland d'superstission.

A staran dle singh ses ore
 Tra lor aitre li a descòre
 Pr contè i seu seugn bagian;
 Peui a s' buto interpreteje
 Così bin, ch'a s'cherdo aveje
 Già 'l guadagn sigur an man.

Una dis: i son sogname
 L' autra neuit ch'a m'an portame
 Dle pi bele fior d' present;
 A veul di ch'i son sigura
 Del fait me; na fas gagiura,
 Lo vedri, tni bin da ment.

N' autra dis: e mi al contrari,
 J' eu sognà ch' un impresari
 M' ha portà un tascat d' dnè;
 Loli dis, ch'i son pro lesta,
 Ch'a m'an già pagà la festa,
 E ch'i m'peus gratè 'l darè.

N' autra peui, ch' l'è pi sapienta,
 Dis: mi j' scondo a la serventa
 I me nom sot al cussin;
 L' andoman matin mi pronta
 Fas rifles a lo ch'a conta,
 E guadagno bel e bin.

Coula veja sauta fora
 An disend: i campe all' ora
 Vostre ciance e 'l vostr fià;
 Ascotè, mi veui mostreve
 La manera pr vagneve
 Dij quattrin a sacocià.

Butè i nom a banda snestra
 Una neuit fora dla fnestra,
 Senza tnine gnun an ca;
 E s' i seugne d' alegrie,
 Giughè pur, ma su d' folie
 Pieve guarda, giughè pa.
 N' outra dis: oh ste ampò chiete,
 Couste son tute lumete
 Da contè sot al fornèl,
 Son rason da ciaciaronne,
 O ch' i burle, o ch' i mincionne,
 O ch' j' avi perdù 'l servel.
 A l' è mei arcomandesse
 A quaichun ch' veuia ambarchesse,
 E tirè prest i caussat;
 Suplichelo, mort ch' a sia,
 A vni pr cortesia
 A porteve quaich bon biat.
 Venna 'l bsest a le tomonne!
 Sonne cose da proponne?
 L' è un afè da rompie 'l nas,
 O ciapeje pr j' orie
 An sentend ste gofarie,
 E slongheje longhe un ras.
 Ma lassoma ste dotoire,
 E guardoma ste arvendioire
 Com' a son afacendà;
 L' è un miraco s' una manca
 A portè i seu dnè a la banca,
 Pr nen tnije dsimpiegà.
 Ortolanne, e ghingajere,
 E paisanne, e lavandere,
 E servente, e servitor
 S' a l' aveisso bin a penna
 Mach sing sold, j' è gnun ch' ai tenna,
 L' an piasi d' fè rie d' lor.

A faran giunè la gola,
 Ma lassè passè una sola
 Estrassion senza giughè
 L'è 'n sproposit a penseje,
 I podrie masacreje,
 Tant e tant j'è nen da fè.
 Quand a l'an la borsa sbrisa
 A vendrio la camisa
 Con i matarass del let;
 Stagn, e bronse, e cassarole,
 I paireui, palëte, e mole
 Van, e angagio tut al ghet.
 I dorin e le granate,
 I cotin, faudai e ovate
 Ai impegno al Mont pietà;
 O ch' a guardo d' fè un' arsorsa
 Ai mari d' antorn dla borsa
 Quand a son adormentà.
 A son tant ancarognie,
 Ch' a fario d' mascarie
 Pr podeje guadagnè;
 A l'an tant lolì an testa,
 Ch' a fario andè la resta,
 Fin a l' ultim dij doidnè.
 S' i voli amparè a dritura
 La manera pi sigura,
 E pi facil d' andvinè,
 Giughè nen al seminari,
 E mandelo a ca dij giari,
 Tni an sacocia i vostri dnè.